

Nagins daners per radio e televisiun?

In cler na en il cussegl dals chantuns

DA LUCAS DEPLAZES / ANR

■ **Il cussegl dals chantuns refusa l'iniziativa dal pievel da dismetter las taxas da Billag, quai vul dir snegar ils meds finansials per radio e televisiun. En il center è stada la dumonda da la coesiun naziunala e la muntada d'ina infurmaziun equilibrada e d'alta qualitad.** Ina iniziativa dal pievel pretenda da dismetter las taxas da Billag. Billag incaschescha las taxas per la SRG SSR. Cun quels daners finanziescha la SRG SSR ils programs naziunals per radio e televisiun.

Il cussegl federal recumonda in na Il cussegl federal recumonda da refusar l'iniziativa dal pievel «Gea, da dismetter las taxas da radio e televisiun – taxas per Billag». Il cussegl federal fa attent che la Svizra dovria en tut las regions linguisticas in servetsch public da buna qualitad. Cun la dismessa da las actualas taxas per radio e televisiun na pudess ni la SRG SSR ni ils privats – che retschaivan ina part da las taxas – garantir lur incumbensa. Gist en in pajais uschè pitschen sco la Svizra plurilingua saja necessari ina instituziun independenta che segireschia ina purschida d'infurmaziun, da furmaziun, da cultura e da divertiment per tuttas gruppažiuns. Quellas cundiziuns èn da gronda muntada per la democrazia directa e contribueschan considerablmain a l'integraziun da tuttas persunas en nossa cuminanza, accentuescha il cussegl federal en sia missiva al parlament. D'in gea



Billag incaschescha las taxas per la SRG SSR. Cun quels daners finanziescha la SRG SSR ils programs naziunals per radio e televisiun.

KEYSTONE

a l'iniziativa fissan pertutgadas il pli fermas minoritads linguisticas da noss pajais. Grazia a la gulfivaziun da las finanzas èsi oz pussaivel da porscher en las trais linguas uffizialas in program cumplain da radio e da televisiun en in program adattà per la quarta Svizra.

Da las entradas per la SRG SSR derivan 24,5% da la Svizra romanda e 4,5% da la Svizra taliana, la pli gronda part da la Svizra tudestga. Quests meds vegnan repartids sin las regions linguisticas en il senn solidaric, quai vil dir: 32,7% per la Svizra franzosa e 21,8% per la Svizra ta-

liana. Per pudair porscher vinavant buns programs è dependenta la SRG SSR da las actualas taxas. Actualmain finanzieschan radio e televisiun lur prestaziuns per trais quartas cun las taxas incassadas da Billag e per ina quarta cun entradas or da la reclama. La finanziaziun mo cun

entradas or da la reclama avess ina reducziun massiva da las purschidas. Sco en Svizra sustegnan blers pajais lur servetsch public cun meds publics.

Da gronda muntada per il territori muntagnard

Werner Hösl (pps/GL) apprezzescha las prestaziuns da la SRG SSR, la digitalisaziun vegn dentant a purtar grondas midadas sin il sector da las medias. Adina dapli giuvenils s'infurmeschan sin l'internet, independentamain dal program d'emissions. Josef Dittli (pld/UR) accentuescha la gronda muntada dal servetsch public garantì tras la SRG SSR per ils territoris muntagnards e per las minoritads linguisticas. Questas regions na pudessan mai procurar sezzas per l'infurmaziun necessaria. Dentant duai er la SRG SSR sa dumandar sch'ella stoppia far tut quai ch'ella presta oz. Per Stefan Engler (pcd/GR) è la SRG SSR in model tipic per la Svizra. Ella ha en emprima lingua ina funcziun da servir a tuts e porscha in excellent program per tut la Svizra. Sia funcziun è da declarar a tut las quatter regions l'identitad da la Svizra, sia cultura multifara cun in program equilibrà e da buna qualitad schurnalistica. In gea a l'iniziativa muntass in grond donn per la coesiun e per il federalissem da noss pajais. Promoturs da l'iniziativa m'han cusseglià che ils Rumantschs pudessan finanziaziun sezs lur agens basegns audiovisuals, la finala er cun meds da la taglia chantunala. Il cussegl dals chantuns ha refusà unanimamain l'iniziativa.